

**PERUTUSAN KETUA SETIAUSAHA KEMENTERIAN PENDIDIKAN TINGGI  
YBHG. DATO' SERI ABDUL RAZAK BIN JAAFAR**

Assalamualaikum Warahmatullahi Wabarakatuh,

Alhamdulillah, saya memanjatkan rasa syukur ke hadrat Allah SWT kerana dengan limpahan rahmat dan kurnia-Nya, kita semua dapat terlibat secara langsung mahupun tidak langsung dalam Karnival Sukan Mahasiswa (KARISMA) UiTM kali ke-28, 2023 di UiTM Cawangan Pulau Pinang.

Ucapan ribuan terima kasih dan syabas kepada pihak Universiti Teknologi MARA (UiTM) dan seluruh jawatankuasa kerja KARISMA yang telah berusaha dan membantu merealisasikan harapan pihak Kementerian Pendidikan Tinggi untuk mengilap dan mencungkil bakat atlet-atlet dalam kalangan mahasiswa di institusi pendidikan tinggi.

Pelaksanaan karnival sukan di UiTM seperti KARISMA ini, selaras dengan mandat yang telah diberikan kepada Majlis Sukan Universiti Malaysia untuk terus membangunkan sukan di peringkat IPT. Penganjuran karnival ini telah mengabungkan para atlet dari seluruh institusi pendidikan dan melahirkan jaguh-jaguh sukan yang seterusnya berjaya membawa nama Malaysia di persada antarabangsa

Saya mendoakan agar segala usaha gigih dan kerjasama yang telah diberikan oleh semua pihak terlibat akan dibalas dengan kebaikan. Semoga UiTM dan warganya terus melahirkan mahasiswa yang bukan sahaja cemerlang dari segi akademik malah juga dalam bidang sukan.

Selamat berjuang semua atlet dan kontinjen negeri.

Terima kasih.

**PERUTUSAN NAIB CANSELOR UNIVERSITI TEKNOLOGI MARA  
YBHG. PROFESOR DATUK DR. HAJAH ROZIAH MOHD JANOR**

Assalamualaikum warahmatullahi wabarakatuh dan Salam sejahtera.

Syukur ke hadrat Allah SWT atas limpah kurnia serta izin-Nya, dapat kita menjayakan Karnival Sukan Mahasiswa (KARiSMA) kali ke-28 (XXVIII) 2023 di UiTM Cawangan Pulau Pinang.

Kejohanan KARiSMA merupakan acara sukan tahunan UiTM yang melibatkan penyertaan para atlet daripada seluruh cawangan di Malaysia dan sentiasa mendapat sokongan yang padu oleh warga UiTM. UiTM sentiasa menyokong penuh penglibatan para pelajar dalam menjalani dan menyertai aktiviti sukan sehingga ke peringkat antarabangsa. Kejohanan sukan peringkat tinggi sebegini merupakan landasan yang terbaik untuk mencungkil bakat dan seterusnya mengembangkan potensi pelajar untuk menjadi pelapis serta peneraju kepada pembangunan sukan negara.

Sehubungan itu, saya menyeru kepada semua mahasiswa dan para atlet serta pihak yang terlibat secara langsung atau tidak langsung, agar mengambil manfaat sepanjang berlangsungnya kejohanan KARiSMA 2023 ini. Saya yakin, bahawa penglibatan para pelajar dalam carnival sukan ini, dapat membantu menjayakan aspirasi universiti ke arah melahirkan atlet tersohor yang mampu memberi daya saing yang tinggi bukan sahaja di dalam negara, malah pada peringkat antarabangsa.

Penganjuran kejohanan tahunan seperti KARiSMA ini memerlukan gabungan tenaga dan kerjasama yang jitu daripada semua pihak. Oleh itu, pengendalian karnival ini perlu konsisten dan menjadi pemacu aspirasi kepada penganjuran program-program yang lebih hebat pada masa akan datang.

Saya pasti, dengan adanya iltizam sebegini, pembangunan dan pelaksanaan sukan di UiTM akan lebih lestari dan kukuh. Melalui kejohanan KARiSMA ini juga, nilai-nilai murni, sifat berdisiplin, bertolak ansur, ketepatan masa, semangat kerjasama, kepimpinan dan dapat dipupuk dalam kalangan mahasiswa dan waga warga UiTM.

Semoga matlamat serta objektif kejohanan KARiSMA 2023 ini tercapai dengan jayanya. Tahniah dan syabas saya ucapkan kepada UiTM Cawangan Pulau Pinang selaku penganjur

KARISMA 2023, kampus-kampus negeri, ahli jawatankuasa, dan para atlet serta semua yang terlibat dalam menjayakan karnival sukan pada kali ini.

## **PERUTUSAN TIMBALAN NAIB CANSOLOR (HAL EHWAL PELAJAR) UNIVERSITI TEKNOLOGI MARA**

**YBHG. PROFESOR DR. HAJI MOHD SAZILI SHAHIBI**

Assalamualaikum Warahmatullahi Wabarakatuh,

Karnival Sukan Mahasiswa (KARISMA) telah menjangkau usia 28 tahun dan dalam masa tersebut UiTM telah banyak melahirkan bakat-bakat muda yang telah bersinar pada peringkat kebangsaan dan antarabangsa.

Sesungguhnya, kejayaan untuk melahirkan seorang atlet bertaraf dunia bukanlah suatu perkara yang mudah. Ia bukan sekadar hasil usaha individu malah melibatkan pelbagai pihak. Penggembengan pemikiran dan fizikal serta dibantu dengan penyusunan strategi yang berkesan oleh pelbagai pemegang taruh jelas membuahkan hasil yang cemerlang.

Mahasiswa atlet merupakan aset penting bagi menentukan masa depan negara yang lebih cemerlang dalam sukan. Justeru itu, tumpuan mendidik atlet di universiti secara seimbang sangatlah penting. Oleh hal yang demikian, pelaksanaan 1 Pelajar 1 Sukan adalah amat penting untuk mentransformasi mahasiswa atlet ke arah Universiti Bersukan. Matlamat dasar ini merupakan inisiatif yang akan membolehkan pelajar mencapai, menggunakan dan menyebarkan kemahiran serta ilmu pengetahuan yang diperolehi mereka bagi kegunaan sepanjang hayat.

Pada kesempatan ini, saya mengucapkan ribuan terima kasih dan syabas kepada Jawatankuasa Pengelola Karnival Sukan Mahasiswa (KARISMA) kali ke-28, 2023 iaitu UiTM Cawangan Pulau Pinang kerana telah berjaya melaksanakan kejohanan ini dengan cemerlang.

Akhir kata, saya berharap agar taraf sukan UiTM akan terus maju dan berjaya melahirkan lebih ramai atlet yang berbakat.

## **PERUTUSAN REKTOR UiTM CAWANGAN PULAU PINANG**

**YBHG. PROFESOR IR. DR. HAJI AHMAD RASHIDY BIN RAZALI**

Assalamualaikum Warahmatullahi Wabarakatuh,

Pertama sekali, marilah kita bersama-sama memanjatkan rasa kesyukuran ke hadrat Allah SWT kerana dengan limpah kurnia dan izin-Nya, dapat kita bersama-sama mencapai impian dalam merealisasikan penganjuran Karnival Sukan Mahasiswa (KARISMA) kali ke-28 (XXVIII) 2023 yang berlangsung di UiTM Cawangan Pulau Pinang. Saya amat berbesar hati dan mengalukan-alukan kehadiran semua pihak ke UiTM Cawangan Pulau Pinang.

KARISMA merupakan kejohanan sukan yang menghimpunkan para atlet terpilih dari seluruh kampus negeri untuk mengembangkan bakat serta menunjukkan potensi yang ada pada mereka untuk menjadi mahasiswa yang berjaya dalam sukan serta pendidikan. Kejohanan ini juga, melahirkan golongan mahasiswa atlet yang boleh bersaing pada peringkat universiti dan antarabangsa.

Di samping itu, penglibatan daripada setiap individu sama ada secara langsung atau tidak langsung dalam penganjuran kejohanan telah menghasilkan pelbagai manfaat seperti perkongsian ilmu pengetahuan kesukanan, memperkukuhkan hubungan kekeluargaan sesama warga UiTM serta dapat meningkatkan tahap pencapaian sukan UiTM. Justeru, saya selaku wakil tuan rumah amat berbesar hati menerima kunjungan semua kontinjen atlet dari seluruh kampus negeri ke UiTM Cawangan Pulau Pinang. Menjadi harapan saya agar kita dapat bersama-sama menaikkan imej dan martabat sukan UiTM di Malaysia.

Akhir kata, sekalung penghargaan dan ribuan terima kasih kepada Naib Canselor serta Ahli-ahli Pengurusan Eksekutif dan Pengurusan Kanan Universiti, Pengarah dan staf sukan UiTM dan Ahli Jawatankuasa Pengelola KARISMA 2023. Penghargaan ini juga diberikan kepada para pengurus pasukan dan semua pihak yang telah memberikan kerjasama dan komitmen yang tinggi dalam menjayakan kejohanan ini. Selamat berjuang diucapkan kepada semua atlet, dan semoga kemenangan serta kenangan ini tidak akan dilupakan.